

東甌金石志

東甌金石志卷八

嘉善 戴咸弼 鼇峯 纂輯

瑞安 孫詒讓 仲容 校補

宋六

口之才聖女山詩刻

義讓天下普現

真通大師 述

此院號淨寧僧居悅聖情

約指今口震修行道自成

一郡合有福住持演法聲

入視六神通在廊憇山靈

歲月

大宋乾道參年

之才

傳傳按右刻在永嘉賢宰鄉聖女山下淨靈寺西
高巖上共九行首行六字二行五字三行至六行
各十字七行存二字八行六字末行二字正書徑
四寸餘詩語淺俗首行更費解或有脫誤之才不
著姓或疑卽宋之才攷之才卒於乾道二年見薛
艮齋浪語集宋侍郎行狀茲刻當別是一人

大廣化寺題字三種

乾道三年丁亥

右在永嘉大廣化寺大殿下甬道石旁字徑四寸
女弟子舒二娘捨錢

四恩三有乾道三年丁亥

右在寺橋外砌石兩旁下斷缺字徑五寸

乾道五年己丑歲十一月初七日未日當院□□衣鉢錢命工建立

右在三門石柱上字徑三四寸不等大廣化寺見前已上三種謝文波錄示

孫詒讓案錢氏四史朔閏表乾道五年十一月癸丑朔則初七日適得己未此刻與彼合

宋壙志殘石

九年歲在癸巳

疾終於家享年四十有

四年丁酉歲十月壬申

郭溪之原男一人鎬女

事郎江南西路轉運司幹

□餘尙幼孫男二人恩哥

天性純孝事舅姑如事父

日無閒言治家有法和

□道而天嗇之壽鳴

右殘壙志亦謝文波拓本石在永嘉

都

金家踏步下行楷書徑一寸許文波云四年丁酉

惟孝宗淳熙則九年癸巳九字上必乾道也其子

名鎬未知何姓各行下尙有三四字已磨滅不可

辨

薛良朋壙誌

宋故敷文閣直學士薛公墳識

公姓薛氏諱良朋字季益唐補闕令之之後繇閩徙溫其在永嘉則諱弼官至敷文閣待制在瑞安則公官至敷文閣直學士蓋中興相望爲名臣公治麗水有聲薦入胄監檢法御史臺丞奉常爲尙書郎選知徽州將漕江東二浙守臨安府擢工部侍郎遷吏部以學士出守福泉荆南成都制置四川食祠祿于家十年以淳熙乙巳八月丙子薨年七十階通奉大夫封永嘉郡公贈光祿大夫薨之明年十月丁酉孤璆琳卽所居里之平輿原公所自爲墳葬焉前事二孤與壻校錄公言行一編屬傅良爲狀傅良雖生後然與公同鄉晚數得及門受教又雅從子姓游以所講

聞視今錄尙多闕惟狀當上太史氏謝不敢草孤泣
訴日淺采獲故未具今大事不可乏請書其槩納諸
幽而狀竢他日於是識曰紹興之季年

朝廷

更用二三大臣所汲引皆當世之選而公繇參知政
事辛公以進及

今上時陳福公相遂班從臣觀人莫若觀所與公所
與何如哉方扈

蹕金陵佐戎淮甸

天子召見無虛歲人人謂才欲有所撥煩必曰薛某
也治且安久先進多凋落而公亦老矣歸故廬深與
人絕短衣幅巾往還樵牧閒公固自忘其爲才而
上時時記不忘也至其以荒政修進直龍圖閣三抗
章竟不拜官同產子二人而不以及孫則又過人矣

曾大父文聳大父京承奉郎父得與累贈正議大夫
母許氏右丞忠簡公景衡之姪女贈太碩人娶章氏
封碩人子男二人璆宣教郎知饒州餘干縣琳宣義
郎新知福州連江縣三女適林轟從政郎新監左藏
封樞庫門章伯奮迪功郎前臨安府富陽縣尉戴闡
之宣教郎新知紹興府上虞縣孫五人及官者二人
邑子陳傅良述

孫詒讓按右壙誌二十九行正書在瑞安縣帆遊
鄉麗輿近年墓圯得之文爲止齋先生撰今見本
集卷四十九以府志校之文句異同殊繆如唐補
闕令之下不重之字乙巳八月下無丙子二字薨
作卒下薨之明年同十月下無丁酉二字孤璆琳

作孤某平與原平作子屬傅良爲狀傅良作某下
傅良雖生後同日淺上有葬字納諸幽諸作之繇
參知政事繇作由必曰薛某也某作良朋曾大父
大父父名皆作某右丞忠簡公上有故字下無景
衡二字知饒州餘干縣上有前字富陽縣尉尉作
主簿上虞縣下有閩之淳熙二年進士八字或槩
本增省或傳刻舛互當以石本爲正良朋舊郡縣
志無專傳幸此誌所載仕履頗詳足以見其梗概
誌云紹興季年由參知政事辛公以進攷宋史宰
輔表隆興元年五月辛次膺自同知樞密院事除
參知政事六月罷此志所云蓋卽指次膺羅願新
安志載良朋紹興三十二年以左朝奉郎知歙州

卽此志所云選知徽州隆興元年八月除本路轉運副使周應合景定建康志江南東路轉運司題名所載年月同卽此志所云將漕江東也是次膺旣入政府良朋卽有運副之擢蓋卽其所薦也誌又云陳福公相遂班從臣福公卽陳康伯宰輔表康伯以隆興二年再入爲左僕射同平章事兼樞密使至乾道元年二月遂致仕卒据咸淳臨安志隆興二年十二月良朋以左朝奉大夫直顯謨閣兩浙轉運副使知臨安府乾道元年七月除直龍圖閣二年五月權工部侍郎則康伯已卒矣蓋康伯在相位時嘗有薦牘後遂有工侍之權誌終言之耳至所書祖父世系特完具足資考證誌云父

得與母許氏忠簡公景衡之姪女攷周行已浮沚
集許景亮墓誌云女一歸郡學生薛得與景亮卽
忠簡同產兄得與取其女與此云忠簡姪女合諸
女夫惟林轟無攷章伯奮開禧二年嘗爲昌化令
於雙溪驛建新亭旁立東坡祠三衢徐冠爲之記
見咸淳臨安志秩官門戴閫之官終婺州倅見萬
厓府志選舉門樓鏤攻媿集戴厚墓誌云從兄子
溪閫之俱擢儒科則閫之乃岷隱先生從弟也
文雋案石寬二尺三寸高二尺六寸行二十一字
字徑一寸邑子見漢書疏廣傳公卿大夫故人邑
子蓋卽邑人之稱陳傅良字君舉瑞安人登進士
甲科教授泰州改太學錄出判福州知桂陽軍光

宗立稍遷除吏部員外郎遷秘書少監兼權中書
舍人寧宗卽位召爲中書舍人兼侍讀直學士嘉
泰二年授集英殿修撰進寶謨閣待制終于家年
六十七謚文節宋史儒林有傳文無書者姓名或
卽文節手書也孫仲容据此校正本集數處不必
皆是闕誤如月而不日稱名但曰某某蓋集本從
簡之故又如屬某爲狀碑作傅良必曰良朋也碑
作薛某忠簡下有景衡字卒作薨則或薛氏諸子
點定或書丹時所改均未可知惟間之淳熙二年
進士八字全節殊不可解耳

沈樞仙巖題記并詩

淳熙丙午十一月二十一日郡守沈樞

持要同倅周价德藩率兩邑令丞陳孔
光德溥劉龜從伯協王長世慶延葉廣
文文卿視修南塘飯于仙巖因觀梅雨
潭張仲梓才卿甄良友雲卿謝雱季澤
謝天錫元功陳傅良君舉林思純致約
高子莫執中沈季豐儉夫偕來樞系之
以詩莫訝多幽勝仙岩舊得名五潭俱
卓絕二井更澄清領客欣同集磨崖記
此行登臨有餘興恍若在蓬瀛

遜學齋文鈔沈樞仙巖題名拓本跋沈持要重修
南塘事止齋先生爲之記在淳熙十四年三月記
云自冬十月至今三月而成蓋塘甫畢而此刻云

丙午十一月則始事之次月也記但云公與通判及兩邑大夫而已得以考見名字賴有此刻陳永嘉令劉瑞安令與通判周价皆見郡志職官而皆不著其字兩丞則并其名逸之矣偕行八人皆郡邑士大夫或亦與築塘之役記所云卽里居謀始謂是耶張才卿爲忠簡公次子謝天錫謝雱沈季豐皆見郡志而天錫季豐亦賴此以知其字高子莫林思純則郡志所不載也甄良友亦無其人而選舉志有紹興甲戌進士甄龍友今按其字則良友卽龍友也龍友之字亦獨見於此古人於所遊厯往往磨刻巖石書姓名豈無所爲而然也哉

右石高六尺二寸寬四尺二寸十行九行行一十

五字一行十二字正書徑四寸按湖州府志沈樞
字持要紹興十五年進士初調彭澤丞用薦賜對
首論君子小人之辨高宗嘉之除監察御史行比
部員外郎提點福建刑獄除尙書考功郎中乾道
六年遷福建轉運使累遷太子詹事吏部侍郎淳
熙二年湯邦彥論葉衡援樞爲證坐譴筠州居住
十二年起知温州州有三宜治歲試士且萬人託
處浮屠官中兵與民雜居多鬪訟城南達瑞安有
塘積歲傾陷遇潦往往溺死前太守憚其役不敢
議樞治郡之明年先斥帑餘作貢院及五營又靡
錢千一百萬修南塘民或爲歌謠爲香火以祝遷
湖南安撫使旋以中大夫提舉太平興國宮進寶

文閣待制封安吉縣開國男年八十二卒謚憲敏
其題記云視修南塘卽此役也陳孔光乾道中爲
泉州節推數見王梅溪集郡邑志甄龍友樂清人
紹興甲戌進士湖南帥參省志作國子監簿龍友
字雲卿見宋詩紀事或作永嘉人茲云良友豈龍
字之誤邪謝雪乾道己丑進士謝天錫淳熙甲辰
進士威武僉判均永嘉人高子莫亦永嘉人其先
蒙城人忠節公世則之族孫也葉水心之外舅水
心集有高永州墓誌銘云初調郢州京山尉歷知
象山壘水縣以能稱通判台州守積不喜中以法
謫主管崇道觀知永州未到郡卒沈季豐瑞安人
淳熙乙未進士嘉定倅丙午淳熙十三年仙巖志

載此詩領客欣同集作拂石欣同入瑞志又作領
客欣同入可據石刻改正五潭謂梅雨潭三姑潭
雷潭龍鬚潭玉函潭二井謂三皇井煉丹井謝靈
運有舟向仙巖尋三皇井仙蹟詩

葉嗣昌龍鼻洞題名

紹熙改

葉嗣昌

元春來

右在樂清雁山龍鼻洞左壁高處三行行三字正
書中一行字徑二寸六分紀年分列左右字徑二
寸嗣昌字貴修青田人嘉泰壬戌進士官朝散大
夫提舉崇禧觀見景寧縣志又平陽縣志宋縣尉

有葉嗣昌年代未詳不知是一人否

林礪叟墓碣

宋武經郎權發遣兩浙東路兵馬副都監台州駐劄
林公諱望字礪叟溫州平陽牙洋人考諱櫛累贈武
節郎宣和四年壬寅歲二月初八日丑時生厯台州
天台縣酒稅務兩浙東路安撫司將領東南第十將
領東南第三副將淳熙十六年己酉歲十二月十三
日終季子日嚴以紹熙二年辛亥歲十二月十八日
與妣安人趙氏合葬于此

林用霖按宋進士林雄祖望墓在泰順牙陽碣石
高二尺三寸寬二尺四分十行行一十三字正書
徑一寸三分此墓元初以雄起義被發空墳至今

猶存乾隆閒土人於墓前掘得此石林族攜置祠
中雄咸淳戊辰進士據林氏譜景炎丙子二王南
遷元兵窮迫雄集義民助守分水關兵敗宋亡後
以聚義被殺牙陽舊屬平陽今屬秦順

孫讓詒案碑所歷官有云東南第十將領東南第三
副將者馬端臨文獻通考兵考云神宗熙寧九年
分天下兵爲九十二將各總其兵中興後熙寧將
在東南者纔十三將兩浙西路第三福建路第十
蓋望嘗爲福建浙西兩路副將也

趙師林龍鼻洞題名

左文

□□同遊

丁此願而去郡人陳

丑孟秋望後一日重來

金華趙師林以紹熙癸

右在雁山龍鼻洞左壁四行左文首二行行九字
三行八字四行存兩字半行楷書徑一寸至一寸
七八分不等了字左半微缺石有孔穴驟望似台
字細揣乃辨同字上二字不全

王煥章謝公像碑

慶元丁巳郡守王煥章立

右一行在像右

至正癸卯夏教授鮑□台郡范士

缺

至順庚午仲

缺

右二行在像左

碑在郡學名宦祠高五尺七寸七分廣三尺二寸一分像高四尺一寸六分大頤方口美鬚髯手卷于左顧立慶元一行十字隸書徑七分丁巳爲慶元三年萬厯府志秩官門王煥章慶元閒以朝議大夫知温州此卽其所刻孤嶼謝公亭有明代摹刻碑跋云謝公祠舊有石刻謝康樂像宋慶元丁巳王守煥章立祠廢及元至正己丑遷於郡學之先賢祠成化丁酉摹刻於江心寺之謝公亭致先賢祠初在大成殿戟門西兼祀鄉賢名宦明成化庚子始就戟門東創新祠祀名宦西祠以祀鄉賢今碑陷名宦祠正中壁閒全像完好精彩奕奕惟左首上方縱橫石泐一尺六七寸此處舊必有題

字兩旁雖尙有款識可尋爲神位所掩人多未經
寓目亦不知爲謝公像孤嶼碑四方來搨者不少
此石厯年久質微脆不任椎擊光緒乙亥重五命
僞兒用意拓得一紙懸之齋壁至正至順兩行下
缺存一十八字正書徑八分教授鮑下一字剝蝕
不可辨按明史鮑恂傳元至正中授温州路學正
而郡志不載此疑卽恂是時或又兼攝教授歟吳
永芳嘉興府志鮑恂字仲孚崇德人洪武詔徵耆
儒命爲大學士固辭放歸崇德卽吾禾之石門也

徐浩墓碑

有宋徐世眞父墓

銘公墓者文謬不典平生大畧微見於太夫人薛氏

會稽墓誌餘需立表焉慶元丁巳八月子朝奉郎新
權發遣通州元德泣血書

林用霖案碑在泰順仙居靈峯寺後山宋鄉賢徐
元德父贈朝請大夫徐浩墓碑高九尺六寸七分
寬二尺八寸有宋徐世真父墓一行大字居中徑
一尺至一尺三四寸跋語五十字兩行分列左右
字徑二寸餘均正書筆力英挺有率更風格据徐
氏譜浩卽忠訓郎震公次子字世真娶薛氏生子
四元德其次也浩卒於乾道六年以子貴累贈
請大夫薛氏隨子宦越中卒葬會稽德政鄉廣慶
寺西山之原累封恭人元德字居厚號牧齋自幼
遊學永嘉及東陽與呂祖謙陳亮戴溪等同學登

治熙戊戌進士授紹興府推官轉邵武軍教授歷
徽州通判荊州安撫使以太恭人年老易便改知
廣德軍賜緋銀魚袋方赴丁內艱服滿起知通州
借四品服嘉泰辛酉十一月十一日卒于官贈朝
散大夫歸葬本里以萬厯府志理學門元德傳所
載校之亦大致符合据徐譜所云則浩卒之時元
德尙未登第此碑蓋由越歸里補立者惟玩碑旁
銘公墓云云似葬時已有志墓之文因其舛謬不
足示遠權刻此石而綴以跋語耳父讀若甫

周及善林宗易等岑崎山題名

周及善林宗易沈仲

一朱叔久林自牧林

東園金石記卷之六
宗大沈仲石趙文甫

慶元三年九月四日

同君舉游 章紱刊

右在瑞安岑崎山翠陰洞右壁止齋先生戊午題
名之後五行四行行八字一行四字字徑五寸三
分又三字字徑二寸均正書沈仲一名體仁瑞安
名家其先有彬老者北遊程氏師生閒得性命微
旨方禁春秋學石經甫刻卽廢彬老竊賂守者自
摹藏之仲一珍其遺書閣以茂焉葉適爲名曰深
明又嘗師陳君舉以儒術廉恥高門戶不求官達
問生產見水心所爲墓誌餘並無攷
孫詒讓案止齋集與林宗易倡和詩甚夥又有赴

林宗大招賞牡丹詩其送蕃交弟赴江西撫幹分
韻詩引載同餞者十人林宗易自牧並與焉則宗
易輩與止齋遊從蹤跡殊密當亦一時勝流惜其
名並無攷

鑊井闌題字

左文

重鑄

比丘

當寺住山

年九月日

慶元戊午

兩浙金石志右題字在永嘉縣興文坊社廟前

右井闌題字阮元兩浙金石志亦箸錄攷戊午乃

東陽金石志卷之八
三
寧宗慶元四年距今六百七十年鐵久剝蝕此層
在井闌之內五行正書徑二寸六分左文阮志作
右行非又月下日字住下山字拓本尙可辨阮志
並缺釋又午日兩字下本無缺字比上亦無僧
名阮本誤增兩方圍又當寺比上誤釋當爲常今
並依拓本攷正

陳君舉等神剝洞題名

戊午

瑞慶節於神剝洞會沈四五丈謝大成

周及善林宗易沈仲一徐蘊之林自牧

林宗大沈仲碩有縉雲葉正初永康陳

勇叔同集止齋君舉題名

王伯榮刊

右在瑞安岑崎山翠陰洞右壁趙景仁絕句之後
五行首行二字中三行行十五字末行十字行楷
書徑三寸七分末行又四字徑一寸三分寧宗以
乾道四年十月丙午生及卽位以生日爲天祐節
尋改曰瑞慶沈仲碩三年題名作仲石石碩字通
孫詒讓案止齋分韻送王德修詩序有徐宏字蘊
之卽此徐蘊之也宏徐鉞子中咸淳八年進士爲
潭州州學教授又嘗爲福州古田縣主簿見止齋
所爲徐武叔墓誌及新歸墓表中興館閣續錄亦
載徐宏字尹之平陽人嘉定五年十月以起居郎
兼國史院編脩官實錄院檢討官則蘊又或作尹
又止齋集有跋謝大成所藏曹公顯墨跡有大成

與余同年生之語又有送縉雲葉正初兼簡杜伯高詩其名無攷

觀音寺石孟題字

住山訥菴誌

嘉泰辛酉二月

孫詒讓案右石孟刻字在瑞安周湖觀音寺孟橢圓長七八尺此十一字徑三寸刻其兩端辛酉爲嘉泰元年

崇壽寺鐵鐘款

宋嘉泰元年十一月施主徐季海僧富院等募鑄右鐘在泰順木棉村崇壽寺高四尺有奇徑三尺有奇林君亨甫錄寄文不全

白鶴廟石砌題字

嘉定戊辰歲二月日劉九公号

右石砌在永嘉四十二都橫溪白鶴廟邊水溝中
字徑六寸

朱偉壙誌

有宋迪功郎朱公夫人解氏壙識

公姓朱氏諱偉字仲南行第十二世居永嘉之珍溪
曾祖旺妣周氏祖益妣劉氏父德真妣黃氏何氏劉
氏封孺人公夫人解氏同郡樂成解公元盛女也公
兄弟四人長兄早亡公年弱冠而失所怙躬勤家業
酬應內外勉二弟通及弼以刻意問學不使預生理
事期於修身成名植立門戶既而二弟俱有聲場屋

聯翩仕版靖推厥由皆公力也嗣是家道日肥孫子日盛懽然友愛萃於一門同居無異財共食無異議自少至壯自壯至老融融怡怡和氣浹洽月旦之評咸曰朱氏兄弟猶有張公藝之遺風公處之裕如也故能涵養德性康彊少疾晚年雖徵坎軻未嘗輒親藥石而又得夫人左右君子動循禮法娣姒之間恬然一體而典型未亡豈不韙哉惜乎天不憖遺歲月有限弗克相與於無窮也公生於紹興壬子該慶典恩霈授初品官以嘉定辛未七月廿一日卒於寢享年八十夫人生於建炎戊申先公八年卒享年七十五至是始得吉卜於呂公山祖塋之右遂合葬焉嘉定甲戌十有一月廿四日也子男三人長慶少殤次

直方直大皆業儒孫男五人曰捷曰應詳曰達老曰
僊老曰挺翁女孫一人並幼將葬二孤移書太學命
姪壻內舍生陳欽實識歲月於壙欽實不得辭里人
新筠陽口官王棟填諱

謝思澤案右朱偉壙誌及後朱弼朱通兩壙誌在
永嘉四十一都廊下墓蕪沒未有知者道光間朱
氏脩家乘瀕竣矣而其地古樟大數抱無故自倒
露三壙共爲一穴誌石高一尺六寸廣一尺八寸
三碑相若錄其文仍埋而葺之

葉宗大龍鼻洞題名

葉宗大來

乙亥春

東陽金石志 卷之六
右刻在樂清雁山龍鼻洞左壁包舉題名之次二
行正書首行四字字徑二寸六分次行三字字徑
一寸二分宗大永嘉人宋上舍釋褐見縣志不載
釋褐年月又處州府志亦有葉宗大龍泉人嘉定
丁丑進士則此乙亥疑卽嘉定八年不知題名者
果係何人今姑附於此

石梁洞前七佛塔題記

信女謝氏十二娘法

名智恢建鳩上社口

增崇福海挺秀壽山

融蕩積德莊嚴來報

右第二塔計四行

信女吳氏八娘男方叔津

孫榮老建所鳩

功德增崇福壽者

右第三塔計三行

比丘嗣宗建所鳩

功德追薦

先考月林細二郎妣親陳

氏十七娘遠年超昇蓮界

嘉定九年丙子歲九月十五日建

幹緣比丘嗣宗

匠人鄒孫

右第四塔兩方計七行

比丘嗣宗建所鳩

功德追薦

先師向山主圓滿願心

超登 品位

右第五塔計四行

孺人周氏妙粹建

莊嚴福壽

右第六塔計二行

塔在樂清雁蕩山石梁洞前橫列七座青石琢成
上有頂下有座中間用石疊起作塔形梵語所謂
窣堵坡者當卽指此三四兩塔六層餘五塔五層
通作六面第四層形橢圓向北作龕形中鑄坐佛

字在第三層下層爲異獸旁兩面刻各種花卉體態生動極爲精妙第四座居中高九尺第三第五座左右列稍殺高八尺餘四座高七尺第一塔面南題字已剝蝕惟行首信士謝三字可認第四塔刻兩面餘五塔刻一面第七塔無字行款字數皆不等正書徑一寸二分洞前舊有石梁寺久圯塔立烟蕪中乙亥秋九月僞兒偕徐淞樵訪古山中不及諦視丙子九月初八余遊屐經此披荆榛觀之覺有字呼兒搜剔知爲宋嘉定九年丙子歲刻石因作長歌紀其事是日又於北碧霄洞得明正德十一年丙子佛堂碑記蓋非偶然矣

先君諱伯驥字德遠姓林氏曾祖祐祖惟珣父岳世居溫之樂清娶同邑城田戴氏先君生於紹興戊寅十月戊子卒於嘉定乙亥正月庚午得年五十有八先妣生於紹興丁丑十月辛酉卒於嘉定癸酉十一月己丑得年五十有七男輅女適知漢陽軍徐瑄之次子敬子卜嘉定丙子十月己未合葬于永康鄉湖濱祖隴之下從先志也孤哀子輅泣血誌以納諸壙國學生徐鼎填諱

程麟刻字

右樂清林伯驥壙誌傳君省三塌來高一尺五寸寬一尺七寸十二行行十三字正書徑八分古人志墓有顯揭墓上者有隱闕墓中者幽銘陽碣自

東漢時已然茲刻所述寥寥乃納幽之文其生平出處或別有碑表也

孫詒讓案林伯驥舊府縣志無傳此誌僅敘世系生卒而不及官秩蓋未涉仕途者子輅亦無攷惟誌云女適知漢陽軍徐瑄之次子敬子瑄字純中其先晉江人父朝散大夫定始徙永嘉慶元元年法科授慶元府司法參軍除大理評事江東提刑司榦官改京秩知安仁縣復召爲評事三遷大宗正丞權刑部郎官兼戶部左曹厯知嘉興益國府未上改漢陽軍夔州路轉運判官直秘閣夔路安撫進寶謨閣知瀘州潼州路安撫召除刑部郎官主管成都府玉局觀還直寶謨閣主管紹興府干

秋鴻禧觀知饒州召爲戶部郎官大理少卿以治
濟王獄忤史彌遠貶象州卒端平間進贈集英殿
脩撰見魏了翁鶴山集所爲墓誌萬厯府志宦業
傳亦有傳所載仕履疏略不足徵也惟魏誌載瑄
三子長獻子儒林郎次欽州司法參軍文子以遺
澤補官差監平江府百萬西倉門次巽子與誌所
云次子敬子不合疑今本鶴山集傳寫舛互不若
石刻之可据也誌末又云國學生徐鼎填諱攷葉
水心集徐大淵墓誌云長子鼎國子學生大淵名
璣卽瑄之兄子瑄抵迂權奸風節冠世而與伯驥
爲婣連則伯驥當亦非庸流矣

郭津等龍鼻洞題名

郭津子集

度劉泳嘉

定丁丑秋

冬姪樗來

右在樂清雁山龍鼻洞左壁四行行四字正書徑
二寸三分許其文義冬姪樗來一行似是續鐫然
筆法一律

孫詒讓案郭津字希呂東陽人朱子晦菴大全集
有答郭希呂津書其仕履無考葉水心集登北務
後江亭贈郭希呂詩云郭翁雖老猶貌澤腹貯今
古心和平只應獨將笏拄頰清坐都不挂毫髮何
必隨逐欄頭奴日追稅錢三萬億疑希呂嘗爲溫

州監稅又有題郭希呂劉詠道游雁蕩詩後詩此
劉詠疑卽詠道也樗蓋希呂從子明郭鉄石洞貽
芳集載康文虎石洞紀行石刻有郭德揚同遊德
揚子伯涇侍之語後附郭樗跋云昔我祖我父與
諸賢爲石洞之遊是樗爲伯涇之子德揚之孫德
揚名良顯亦見水心集郭處士墓誌伯涇蓋其長
子湜也互相推校則希呂蓋又德揚之從子矣

郭樗龍鼻洞題名

嘉定丁丑

孟冬子樗

端拜敬觀

右在雁山龍鼻洞左壁郭津題名之前三行行四

字正書徑二寸六分

郭禧白石山題名

東陽郭禧

耆甫嘉定

丁丑仲冬

八日來游

右刻在樂清白石山玉虹洞左四行行四字正書
徑五寸六分丁丑嘉定十年

陳謙墓誌銘額

宋故翰林

亦未提

江弼有

興國宮陳

公墓誌銘

孫詒讓案右宋陳謙墓誌銘篆額在永嘉建牙鄉
宋與河頭墓道前俗呼爲石馬墳誌文葉適所撰
凡二千餘言見水心集中今誌石已亡失惟篆額
二十字尙存與水心集目錄正同不知何人書也
謙字益之中乾道八年甲科開禧閒知江州罷提
舉江州太平興國宮卒事蹟詳墓誌及宋史本傳
誌載謙嘉定九年八月卒十年正月葬建牙鄉鵬
飛里今附於此水心名德瑋文碑版照一世集中
所錄碑誌凡百四十餘篇爲郡人作者幾及五十
篇今無一存者此誌幸未淪失又僅餘一額可慨

也

丹芳嶺磨崖

嘉定十一年比丘如印

南無觀世音菩薩

南無阿彌陀佛

南無大勢至菩薩

歲次戊寅奉勸稱念

右在樂清雁山丹芳嶺頭佛號三行字徑五寸題
款兩行分列左右字徑三寸正書上下刻蓮花形
朱彌壙誌

有宋監潘葑庫朱君壙誌

公姓朱氏諱彌字文叔世居永嘉珍溪之原曾祖考

旺曾祖妣周氏祖考益祖妣劉氏皇考德真妣黃氏
何氏封孺人劉氏封孺人公配林氏同郡樂成林忠
裔之女有子二人直諒直浩女二人長男娶李舒州
之女孫也孫男建翁女孫二人公夙齡喪父卓爾強
立隨仲兄宗教勵志就學年踰弱冠請解薦解照度
戊

允宗龍飛授福州長溪西尉洎官勸敏邊海牧遠兩
獲強盜賞格咸該雅意不喜以人命易官爵故終不
自列任滿轉修職郎辟差監兩浙轉運司潘蕤徽省
酒庫公素恬澹放佚丘園迄弗肯赴丐祠監潭州南
嶽廟已而屏居引養者十餘載友于二兄季皆悼髦
皓首怡怡終始無閒言嘉定九年歲次丙子八月九

日不祿壽八十夫人林氏慈順端靜待族黨咸睦撫
媵婢有恩閭閻肅雝先公三月而終享年七十其孤
卜以己卯歲冬十有一月生明後一日丙申合葬于
呂公山祖塋之側姪壻國學上舍正奏名吳幼存謹
誌諸壙

右永嘉朱弼壙誌据謝文波鈔本錄入文中請鄉
薦請字疑有誤李舒州据後元李永孫壙誌名異
萬厯温州府志選舉門有紹興辛未進士李異永
嘉人知舒州卽其人也

孫詒讓案宋史職官志監當官掌茶鹽酒稅場務
征輸及冶鑄之事諸州軍隨事置官建炎初詔監
當官闕許轉運司具名奏辟此誌云辟差監兩浙

轉運司潘葑激賞酒庫卽所謂監當官也潘葑庫者咸淳臨安志云行在贍軍激賞酒庫有潘葑庫在常州無錫縣咸淳毘陵志官寺門亦載無錫縣潘葑庫隸激賞所是也誌文爲吳幼存所撰卽弼兄通次女夫也見後朱通壙誌

崗頭井闕題字

嘉定辛巳歲正月立

右永嘉五十一都崗頭李宅街頭井闕題字字徑四寸

蘇景行壙誌

有宋處士蘇公夫人孔氏壙記

先君諱景行字伯山溫平陽人生於建炎戊申之二

月四日歿於嘉泰癸亥之九月二十三日葬於嘉定
乙亥之八月十九日太夫人諱守真鄉先生孔公習
周女生於紹興乙丑之七月二十日歿於嘉定庚辰
之九月十二日葬於壬午之九月二十八日享年皆
七十有六子二人女適鄉之氏族男丙應進士科始
先君□太夫人買山於邑之白石里雅山原爲二壙
詔二子以吾死當□□此至是不敢違也遂祔蘇氏
之先自閩徙溫至先君□□世曾祖矧祖憲父桴皆
潛德不仕從父武功先生權以□□學有重名成
均先君實學焉性行篤淳容止端嚴爲文□尤□古
有法度紹興間遊京師多交渡江諸名人聲益起諸
□弟分財自予□□弗問曰吾當自奮耳科舉學方

盛以不作慙筆每試輒工留滯滋久故丙之生也太
夫人自鞠育之及稍長又自爲擇師□燈寒夜載縫
載紉則坐丙於旁使誦書必極倦然後與俱止如是
者幾十年他日先君歸曰吾有子可教矣□□不復
遊榜所居室曰得軒聚書數千卷晝披夜吟左指右
授自爲師生家雖貧不移素守不屑與俗者語事有
拂亂吾意□□□古人慷慨悲壯之辭以自慰解或
聞見於詩邑之士敬□□□于州若縣以主學校曰
此長者也太夫人清勤介直家事□悉皆自理□有
無謹不以累先君事舅姑惟孝生養死祭必極誠至
性惡侈篋笥中多藏爲女時衣若未嘗掛體者曰吾
不忍敝之也其克約如此嗚呼此吾父母先德之大

略也言將出涕咽不自勝其能盡述姑合求銘於當代之主言者矣然念曩時客京師聞先君訃奔而歸其附於身者皆不及親其悔也多矣太夫人平生畏登舟車聞人言入京之路川嶺峻險輒震駭晚以丙固請不獲已而從居二年眎京華殊不當意曰吾老矣合以我歸毋使他日載靈舉行脩路也今而蹈所忌矣夫此二者人生大不幸而丙於父母皆有焉其恨奚窮謹泣血記武功先生外孫江西轉運司貢士陳成書諱

王師安刻

孫詒讓案右蘇景行壙誌原石舊藏平陽北港蘇處士璠大雅山房處士字石緣工篆刻收藏金石刻極富今並散失此石亦不知存佚据瑞安蔡布

衣書城所藏拓本錄入景行與從兄武功先生權
舊府縣志並無攷

東甌金石志卷九

嘉善 戴咸弼 趙峯 纂緝

瑞安 孫詒讓 仲容 校補

宋七

林洵厚墓碑

先考諱洵厚字季雅姓林氏九世祖建公徙溫之平

陽四溪曾祖丕祖永年朝散大夫贈正奉大夫父待

舉朝散郎贈大中大夫先君□□紹興辛酉方在

齡知伯氏仍父子取科級慷慨自許刻厲進修長入

太學升上舍登洵熙十一年進士第調泰州州學教

授丁所生母憂喪除差充南外睦宗院宗學教授用

薦者改奉議郎知隨州隨縣踰年□□奏特差通判

房州開□□□兵連盜結先君攝郡籌畫備禦境內

晏然上多其功進秩二等擢知漢陽軍楚右府飢

常平使者行部第漢陽荒政爲列狀首上之朝移

知德安府未幾同邑有不相好者偶居要路醜正詆

誣朝廷察其無他□□自陳宮觀先君素剛簡不能

與時俛仰於是不復有仕進意十餘年四任主管建

寧府武夷山冲佑觀遂告老不允再上疏得旨守

朝請大夫致仕時嘉定十四年也杲忝通朝籍其年

九月以明堂恩敘封朝議大夫明年以慶寶恩

再封中奉大夫又明年三月壬戌感微疾終于正寢

享年八十有三娶黃氏封令人四男長槩先公六年

而卒次杲慶元五年進士朝奉郎通判臨江軍次蔡

嘉定元年武科進士知蘄州蘄春縣曾虜入寇守禦

死之特旨贈官為修武郎次裴嘉定元年進士通

直郎知南康軍建昌縣孫男七人伯樞仲默仲黼叔

羔叔魚季熹季熹其三台州臨

脩職郎監州造船場叔羔將仕郎

孫女三人長許嫁慶元宰相趙忠定之孫必揆曾孫

男一人先君築室鳳巖念莘陽故居為四溪佳山水

欲即其地改卜壽藏杲等欽承先志忍死負土其年

九月庚申奉柩以葬前期敘世系爵里納之穿中嗣

將編次行實乞銘於當世君子杲泣血謹誌

表姪朝請郎前尚書度支郎中林介填諱

林用霖按宋贈光祿大夫安陸守林涓厚墓碑在

秦順四溪華陽碑高五尺餘闊約三尺分三層寫
每層十八行行十一字行楷書徑寸許近蘇體太
湖石摹泐甚精渢渢厚次子杲書林介填諱墓久圯
舊跡無存碑左上角及右下角已缺數十字道光
壬寅林氏子孫攜置大宗祠焉杲慶元己未進士
仕至朝散大夫

文僞按此碑拓本林君寄示文多斷剝太沖學博
所撰分疆錄載其全文較拓本多百餘字今附注
於旁文中曰明堂慶寶恩者嘉定十四年九月辛
卯合祭天地於明堂太赦十五年春正月朔御大
慶殿受恭膺天命之寶先是翟朝宗得璽獻于朝
既而趙拱又得玉印文與前璽同而加大朝廷喜

受之行慶賀禮大赦淳厚贈光祿大夫見後林棐墓碣

孫詒讓案林淳厚舊府縣志無傳此誌所述世系及厯官事蹟甚詳具可補志乘之闕誌載淳厚五子其見於萬厯府志選舉門者林杲慶元己未進士終江東提刑林棐嘉定戊辰進士終信州守據此誌則杲嘗以朝奉郎通判臨江軍棐嘗以通直郎知建昌縣並萬厯志所未載至淳厚第三子棐中嘉定元年武科進士則萬厯志武科并無其名當据此補其闕又元至順鎮江志宋北廳通判題名有林仲黯淳祐十年十二月以奉議郎任此誌載淳厚七孫其三名仲黯當卽其人也又誌載淳

厚孫女三人長許嫁慶元宰相趙忠定公之孫必
揆忠定卽趙汝愚謚汝愚爲慶元賢相事蹟詳宋
史本傳宋史宗室世系表載汝愚第六子崇要生
必揆與此正合誌末又有表姪朝請郎前尙書度
支郎中林介填諱一行介平陽人中奉大夫湜之
子見葉水心集湜墓誌据彼誌湜夫人黃氏封令
人與湜厚夫人黃氏蓋女兄弟故介於湜厚爲表
姪也介仕履志乘亦無攷据范成大吳郡志載介
嘉定十七年提舉兩浙西路常平茶鹽正月兼權
浙西提刑寶慶元年十一月除直秘閣浙西提刑
三年四月兼權平江府十一月除太府少卿依舊
兼權紹定元年改除大理寺卿又咸淳臨安志亦

載介紹定四年三月以中大夫祕閣脩撰兩浙路計度轉運副使兼權知臨安府五月除太府卿兼刪脩勅令官兼知臨安府則介敬歷顯要官秩殊不卑而圖牒荒略竟無其名故附攷之以補舊聞之佚焉

葉味道靈峰題名

葉味道將遊

江東弟任

道姪德承

德揚餞別

工口嘉定

口口孟春

文僞按右在樂清雁山靈峰洞外六行首行五字
五行行四字正書徑五寸四分味道永嘉人初名
賀孫以字行更字知道師事朱熹試禮部第一時
僞學禁行味道對策率本程頤無所避既下第復
從朱子於武夷山中學禁開登嘉定十三年進士
第遷宗學諭從臣薦味道可爲講官授太學博士
兼崇政殿說書遷秘書著作佐郎卒景定閒謚文
脩宋史儒林傳有傳從弟任道字子重師事味道
求朱子之學所得最多葉水心集有送葉任道教
授之官靜江詩云太學奏文誇第一國子先生裏
行立嶺南梅花太枯澀花豈喚人人底急爐亭雪
深叫孤鴻傳書爲憇明光宮雲翻雨覆古來有不

如堂堂金石守郡邑志不載其人讀此詩可畧見一斑矣工□二字疑作于此

陳武壙志

先公諱堃□□□□氏温州瑞安縣帆游鄉固義里□□□之□□焉曾祖怡祖煥父敦樂贈□□□母劉氏贈令人公行誼文章爲當□師學徒輻集名重天下□乾道庚寅入太學累魁多士舍選奏優登□淳熙戊子進士第歷□饒州州學教授除禮兵部架閣文字國子□□□除堃□博士樞密院編脩官兼檢詳□□□□□丞著作郎兼禮部郎官□□□□□子司業除祕書□兼□□□□□□□右諭德除□文殿□□□□□□□□□

□□□□子□紹興甲子□□□□□□□□
□□□□青宮啓□□□□□□□□□□永
嘉吹臺□□□□□□□□□□令人明年正
月□□□□□□□□□□九月壬午合葬焉□
求已□□□□□□□□授南劍州州學教□□□
□□□□公元簡之孫彥直孫男志□□將仕郎□
學將以公遺澤奏孫女景訓景則未行刑部侍郎葉
公適序文集四十一卷兵□尙書蔡公幼學誌墓未
就而□□□薄宦未有所屬門人太學錄章延之等
述行□□附文集後求已泣血書大□納諸壙

孫詒讓案右陳芷壙誌在瑞安帆游鄉灑與墓門
誌爲芷子求已所作石已剝剝文缺者逾半芷字

蕃叟瑞安人事跡詳嘉靖瑞安縣志理學傳以此誌校之大畧符合傳載正慶元初除禮兵架閣遷國子正此誌國子下缺正字又載其進祕閣脩撰兼左諭德除右文殿脩撰知泉州据此誌則左當作右誌文殿上缺右字又下缺知泉州三字可以互相校補又誌中段自丞著作郎至右諭德二行缺蝕不可讀据中興館閣續錄載正嘉定二年四月除秘書丞十二月除著作郎三年三月爲軍器少監五月兼國史院編脩官實錄院檢討官四月除秘書少監五月除祕書監六年五月知泉州此誌秘書丞止存一丞字以下歷官以館閣續錄推之亦尙可得其梗概惟誌云嘗爲武學博士及樞

密編脩官則嘉靖志及他書並未載又云刑部侍郎葉公適序其文集四十一卷攷正集宋史藝文志及他書目並未著錄藉此知其卷數又今所傳水心集此序亦已不存其目僅見於此雖殘缺殊可寶也求己嘉定甲戌進士終雷州倅見嘉靖瑞安志人物及選舉兩門据此誌知求己又嘗爲南劍州教授此誌載正孫二名殘缺据嘉靖志正二孫長志學終莆田宰次時學終江山宰則此誌缺學時二字也其卒葬歲月在缺文中無從攷補誌末亦不詳刻石年月据嘉靖志及館閣錄正以嘉定六年知永州未幾卒而求己以七年舉進士則其卒必在七年以後此誌又有兵部尙書蔡公幼

學誌墓未就而□

此字已缺當是薨字

云云攷水心集蔡尙

書墓誌云以嘉定十年七月薨則此誌之刻又必

在十年以後今姑附於此

朱通墳誌

宋南外宗教朱公墳誌

公諱通字彥達小字文飾永嘉珍溪人曾祖旺祖益父德真俱不仕公登紹興庚戌進士第歷主信州玉山簿陞從政郎調福州寧德丞不赴改南外宗教丐祠監潭州南嶽廟公夙志當世不卑其官筮仕簿領排異議釐宿蠹邑人德之上官有難事輒檄可否悉中利病譽薦溢至得丞篤手足棄榆不忍離遂無意祿仕分教需遠次親故勉到官數月卽解去奉香火

緣樂餘年也性莊重平居揀語無窘步料事精明裁
決凜不可犯而奉親孝與兄弟友愛三荆合芳年俱
九裘同堂怡愉如少時人仰之目爲珍溪三老五福
嚮用自孝友中來施爲雖未竟而大節可觀矣嘉定
丁丑四月戊申卒於家年八十有四夫人余氏知英
德府朝散大夫閔之女警悟書耳目所歷皆省治家
整不以絲粟累夫子若奉葭蘭處妯娌敬共不怠公
之孝友實相以成後公七年卒甲申歲五月辛丑日
也享年七十有五男直清國學進士女長適上舍正
奏名陳欽實次適修職郎荆門軍教授吳幼存孫男
懷祖女一人己戊寅十有一月癸酉殯于呂公山祖
塋側卜者忌未窆寶慶乙酉七月甲申其孤奉夫人

以合葬焉姑書梗概用藏不朽族子修職郎新福州古田縣主簿景彝謹誌

右永嘉朱通壙誌亦据謝文波鈔本錄入其妻父余閱登隆興癸未未待問榜進士萬厯府志選舉門載其官知英州英州卽英德府也

孫詒讓案萬厯府志選舉門宋進士題名亦有通名而不詳其仕履賴此誌存其梗概亦可寶矣萬厯府志又載嘉定丁丑進士朱景彝永嘉人官將作監此誌卽其所撰也

鯉魚山磨崖

名巖數丈石下藏五色土蜿蜒左青龍蹲伏右白虎山川亦何心造物各有主百年程氏塋重修曾大

父碣□屬□尉□□□古陸續談窻奕葉未易
數

寶慶丙戌中秋崇椿居士敬書于雲壑

孫詒讓按右磨崖在瑞安陶山花園底鯉魚山宋
張聲道墓道旁山有二古墓一在山腰有石翁仲
折臥其閒蓋卽聲之墓山麓去張墓百餘步又一
大墓依巖爲壙俗呼爲公主墳謂聲道曾尙主此
其妻墓考宋史公主傳無其事委巷之談蓋不足
據聲道字聲之瑞安人淳熙甲辰進士官湖南提
刑見中興館閣續錄及嘉靖瑞安縣志此詩刻於
壙前巖上字徑三寸許凡六行七十五字第四行
石泐不可辨者六字末署崇椿居士不著姓名此

詩後數句語意晦澀兼之「泐」字缺殊不可解惟
內有百年程氏塋之語丙戌爲寶慶二年上推百
年則程氏之葬當在靖康建炎間聲之淳熙甲辰
始舉進士其非聲之妻墓蓋無疑義墓前有御鳳
樓累石爲之制度工巧今尙存嘉慶瑞安縣志選
舉門以爲宋時賜建然嘉靖舊志及萬厯府志並
未載不知何据樓爲聲之墓道此墓適在其內壙
向與樓門正相直當卽聲之尊屬詩中白云百年
程氏塋重修曾大父程氏上空一字末行又自題
敬書云云則崇椿居士亦必張氏諸子姓志牒闕
畧今無可攷矣

徐德寶造墓告神文

維寶慶二年歲丙戌六月甲申朔庚寅日陽上夫徐
德寶男徐亞雙次男亞全女亞前次女住妹云等謹
立 告于五方五帝山川百靈后土陰官丘丞墓
伯阡陌諸神切念德寶蓋爲先妻潘氏九娘子於今
年二月初五日歿故龜筮協從相地惟吉宜於温州
永嘉縣賢宰鄉羅浮村黃家山後之原或東南西北
地中爲宅兆安厝謹用九萬九千九百九十九文兼
五色綵帛買地壹段左止青龍右止白虎前止朱雀
後止玄武內方勾陳分掌四□丘□□圭步界□建
路將齊整阡陌千秋萬歲□□□災殃若輒干犯茲
禁將軍亭長收付河伯今以□□酒飯百味香□共
爲信誓財地交相分付工匠動土營造墳墓安厝已

後永保休吉見人歲月主保人今日直符故氣邪精
不得干犯口有居者永避萬里若違此約地府主吏
自當其禍主人內外存亡悉皆安吉急急如五帝主
者律令寶慶二年辛丑月十五日丙申

右石在永嘉江北千石村山中文十八行行十八
字正書不工亞卽阿字語助詞也此石今歸瑞安
孫太僕家

孫詒讓案右徐進寶告神文鼇峰先生得之千石
山中今以贈余詳釋其文蓋因葬妻而爲文告神
以祈護佑遂刻石瘞壙隧中不知何時出土文語
極詭陋可笑書體亦拙劣蓋鄉曲俗子略通文義
者所爲首有謹用九萬九千九百九十九文兼五

色絲弊

卽幣之譌

買地一段云云蓋古所謂地券者文

例如是朱陶穀清異錄謂葬家聽術士說例用朱書錢券若人家契帖標四畝及主名是也周密癸辛雜識別集亦云今人造墓必用買地券以梓木爲之朱書云用錢九萬九千九百九十九文買到某地云云此村巫風俗如此殊爲可笑及觀元遺山續夷堅志載曲陽燕川青陽坎有人起墓得鉄券刻金字云勅葬忠臣口處存賜錢九萬九千九百九十九貫九百九十文此唐哀宗之時然則此事由來久矣据周氏所云則唐宋造墓俗例有此但所謂券者或以鉄及梓木爲之不必刻石耳又葉奕苞金石錄補載明萬厯閒會稽掘地得晉太康

瓦券文云大男楊紹從土公買一冢地一丘東極
闕澤西極黃騰南極山背北極於湖直錢四百萬
卽日交畢日月爲證四時爲任太康五年九月廿
九日對共破蒯民有私約如律令蒯券義同劉熙釋書契蒯別也大書中央破別之也案此則地券與周官小宰傳別字同鄭注以爲卽券書則地券
之制晉時已有之又不始於唐矣至文後半又爲
禁約鬼神及祈安吉之語則與地券絕不相涉陶
弘景真誥協昌期篇載建吉冢埋員石文云天帝
告土下冢中直氣五方諸神趙公明等某國公位
甲乙年如干歲生值清真之氣死歸神宮翳身冥
鄉潛靈沖虛辟斥諸禁忌不得妄爲害氣令子孫
昌熾文詠九功武備七德世世貴王與天地無窮

一如土下九天律令此文例與彼頗相近至所列
神名有丘丞墓伯阡陌諸神又云若輒干犯呵禁
將軍亭長收付河伯攷晉葛洪抱朴子禳應篇載
以三皇天文召諸神法有阡陌亭長之稱又遐覽
篇云道經有收治百鬼召五岳丞大山主者記三
卷卽此丘丞墓伯阡陌諸神及將軍亭長等之濫
觴文末又云急急如五帝主者律令則道家符籙
每有此式楊紹荊及真誥冢石文亦已如此蓋雖
村巫俗制不足深論然流俗相沿各有所本亦足
爲金石家廣異聞也

平陽新修縣學記

平陽新修學記 篆額

平陽新修縣學記

紹定四年春平陽修學竣事客以顛末來諗曰吾邑之學伉樛星門者三築墻百步而繚之鑿水半壁梁其上官達重廡翼翼嚴嚴

先聖之宮從祀東西列者咸設帷帟飾琫旒釋菜釋奠弁服雅雅尊罍簠簋之屬如式又作射亭以釋志觀德凡此者主簿吳君興祖所建畫也予其爲我記之余曰學迄是止乎客曰奚止是吳君日延諸生執經論難月校季比文義彬彬若吳君者其知當務之急哉余曰子以爲急務信矣抑外以爲急而內疑其可緩歟夫明智之士類以學爲飾治之具特不可廢爾非真以爲急也下至俚俗則徑以虛文視之甚而

轉相訾病今試與子論其真不可緩者焉余聞教人
莫切於行行者日可見之行也今自

天子之學達于州郡其師儒之官不過文義往來而
其實可見於行事使人靡然心化者影響不接也其
上者則以聲望壓之而已而況未必皆聲望之風著
者哉獨縣邑之官不然其與民至近其朝夕行事皆
在民耳目而著於其心矣夫習見其行事而倣焉斯
其爲教易矣故觀其周隱卹瘼無濫笞無枉捶則疇
不師其仁觀其酌予審取無苛歛無複賦則疇不師
其義觀其約節遊邀靜定言動則疇不師其禮觀其
明謹號令恪守期會則疇不師其信觀其搜蠹剔弊
剖曲析微吏弗克欺姦弗克縱則疇不師其智夫然

則與羣士講論經誼必不至僅爲章句而已指授文
律必不至僅應格程而已客曰然則在人而不在學
乎余曰學者人之寓也教不可無此人則不可無此
學矣於論鼓鍾於樂辟雍此天子之學而文王朝
夕焉者也濟濟多士克廣德心此大國之學而魯僖
朝夕焉者也善者吾從不善者吾改此小國之學而
子產朝夕焉者也夫以實意行實行朝夕于學則學
容可緩諸不然則棖棟連雲采艫耀日亦無補于治
理矣奚怪乎俚俗以爲訾而明智以爲疑也客曰吳
君肅恭明銳一邑藉之今將代而調矣故思述其績
而寄予懷焉夫惟實行民自以爲得師則是學之新
也宜無愧仲秋朔日承議郎新通判信州軍州兼管

東陽金石記 卷之六
內勸農營田事戴栩記承議郎特添差通判婺州軍
州兼管內勸農事任友龍書朝議大夫寶謨閣待
制知婺州軍州事莫澤篆額

右紹定四年平陽主簿吳興祖重脩縣學戴栩爲
記其事碑今在平陽學宮石高六尺一寸寬三尺
二寸六分篆額六字徑五寸四分二十四行行三
十三字正書徑寸許仲秋朔日原刻仲夏秋字改
刊吳興祖紹定元年爲平陽主簿萬厯府志治行
傳稱其留心政事脩理學校益不誣也戴栩永嘉
人字文子岷隱先生之從孫登嘉定戊辰第選秘
書郎爲湖南安撫參議官少時師葉水心得其旨
要見兩浙名賢錄

孫詒讓案此記爲戴浣川所作今 閣本浣川集

從永樂大典錄出詩文缺佚甚多此記亦失收當

据此補錄中興館閣續錄莫澤字潤卿嘉興府崇

德人紹熙四年進士寶慶二年十月以工部侍郎

兼國史院編脩官是年爲吏部侍郎仍兼浚氏萬

姓統譜作字兌夫知汀州抃之子仕至刑部尙書

晚謫居星渚還里卒與館閣錄小異未知孰是 咸

彌案嘉興府志莫澤事蹟無攷附見其父抃傳第

云紹熙進士仕至刑部尙書與萬姓統譜合然疏

略太甚抃字慶叔隆興元年進士主金谿簿知大

冶縣通判郢州朝士薦補內職抃性恬退請郡得

守臨河旋丐祠歸不言其守汀州紀載不同如此

靈山院石門鏡紀年

紹定癸巳太歲

院在永嘉相溪之蒼坡攷舊府縣志仙居鄉有乾符靈山院建于唐咸通間礫石徑二尺五寸雕刻精緻猶爲唐時物重建于南宋元時寺圯有石門鏡二一鐫紹定云云一爲村人琢平鐫同治七年李某捐錢若干重建等字

靈巖寺前七佛塔題記

奉佛信女潘氏三五娘法名

順道同男施顗發揚建造□

佛如來寶塔始終圓滿順道

□一願上報四重深恩下濟

三塗極苦二願同諸助緣幹
緣及在會□□□懺滌罪
愆同生淨土嘉熙元年丁酉
九月日信女潘氏順道□□

右第三塔計八行行十一字

住山比丘惟輓謹募信士劉
日休處女施氏二十娘劉氏
四四娘陳氏十六娘謝氏三
六娘比丘尼道智妙淨等謹
捐淨賄同造寶塔一座秉茲
妙善各懺罪愆莊嚴佛果嘉
熙元年丁酉良月日惟輓書

右第五塔計七行行十一字

塔在樂清雁蕩山靈巖寺前今存五座形製與石梁洞塔彷彿第一塔存末一層第二塔頂缺無字第三塔存四層第四塔同無字惟第五塔完善九層高九尺八寸七分亦作六面字刻第三層東南面高一尺五分寬一尺一寸七分正書前塔字徑六七分不等後塔字徑八分

趙汝譏謝巖題名殘刻

嘉熙戊辰□□□郡守趙汝譏

事暇率

春□□故址澄

月明何處山

春書巖右是日

右刻在謝客巖巖字之右旁正書五行首行十二
字存九字第二行存三字第三行存四字第四行
存五字末行存六字惟末二行十餘字明顯餘俱
從拓本摹擬得之然文義斷續再三尋繹亦不成
句讀攷宋史趙汝譔無傳萬厯府志秩官有郡守
趙汝譔嘉熙初年以朝散郎知此題在戊戌卽嘉
熙二年也與府志合雍正通志職官宋溫守有趙
汝談無汝譔郡志則無汝談按汝談之爲溫守見
宋史宜於通志郡志中各補一人以彌其闕

孫詒讓案中興館閣續錄趙汝譔字獻可本貫玉
牒居于會稽嘉定元年進士端平二年十月以宗

正丞除著作郎是月爲秘書丞三年二月爲軍器少監此題在嘉熙戊戌卽除軍器少監後一年也

高彥芳補刻方干詩跋

方知激颺與噴飛直

恐古今同一時遠壑流

來多石脉寒空撲碎

作凌澌謝公岩上衝雲

去織女星邊落地遲

聚向山前更誰測深沈

見底是澄漪

仙岩名山留題絕少得方干

呈陳明府詩恐季久而無

傳與住山久老言命工磨

崖刊之

嘉熙戊戌十月一日

峭壁

高彥芳書

右在瑞安仙巖梅雨潭外二三百步面西大石屏
上十二行行字不等行書徑六寸餘此詩爲唐方
干所作見元英集題仙巖瀑布呈陳明府今釋佛
彥所撰仙巖志竟題高彥芳同諸友游仙巖詩第
三句石脉作夕照第七句山前作仙前末句是字
作自字文亦小異蓋修志者並未細審高跋遂竟
不知其爲方元英作地志家疏舛可笑有如此者
仙巖之水絕高處爲龍鬚瀑布循雷潭而下爲梅
雨潭飛沫濛濛常若梅天細雨再下爲三姑潭志

東國金石志 卷之六
稱昔有三仙姑謁安禪師一語而悟入潭化去潭
以名焉織女星邊落地遲似卽指此謝公巖山志
無攷康樂曾來或其遺跡乎

孫詒讓案此詩跋刻梅雨潭巨石上石理皴剝椎
拓頗難高跋中率久率字細審拓本又類垂字高
彥芳芳字又類若字未敢臆定方千字雄飛桐廬
人大中中舉進士不第隱居鏡湖徐凝有詩名一
見千器之授以詩律咸通末卒門人謚元英先生
見辛文房唐才子傳此詩題呈陳明府陳蓋瑞安
合惜其名不可攷高彥芳籍貫仕履亦無攷葉水
心集高永州子莫慕誌載其諸孫彥偉彥佩彥符
並以彥字聯名則彥芳疑亦子莫諸從孫矣

林裴墓碣

於虜是爲宋桐川郡太守審計林公之墓公諱裴字功輔溫之平陽人嘉定戊辰進士□生於淳熙庚子十二月二十六日寅時卒於淳祐壬寅二月二十五日戌時積階朝請大夫主管成都府玉局觀祖諱待舉安豐守贈大中大夫父諱淳厚安陸守贈金紫光祿大夫母黃氏封魯郡夫人娶陳氏繼劉氏俱封恭人先公卒公以嘉熙己亥歸二恭人於四溪竝山之塋越五年男季燾娶熹女元佳奉公柩以祔皆維淳祐甲辰八月戊子三窆叶藏千載勿圯告於幽明其治命夫於呼

林用霖按墓在秦順四溪竝山梅岩後山相傳亦

元初爲林雄事被發者石方尺八寸楷書歐體石
堅泐淺舊在墓下土人取安蜂房道光壬寅林氏
重修宗譜訪舊跡得之今置竹溪祠中

孫詒讓案林棐舊府縣志並無傳惟萬厯府志選
舉門載其登嘉定戊辰進士官知信州此誌題其
官爲桐川郡太守攷王象之輿地紀勝江南東路
廣德軍亦稱桐川蓋以軍西南有桐水得名是所
稱桐川太守者卽知廣德軍也陳直齋書錄解題
載趙子直桐汭新志紹定五年太守林棐序卽棐
知廣德時事萬厯府志云知信州者非所終官又
棐嘗以通直郎知建昌縣見前林滄厚墓誌又嘗
以奉議郎知麗水縣見兩浙金石志棐武子麗水

縣奏免浮財物力劄付碑此誌亦並未載蓋誌首
所紀厯官僅寥寥數語其遺漏當不少也

羅漢寺石橋紀年

清

祐

戊

申

建

右在樂清雁山羅漢寺前石橋上五字平列橋眉
正書徑八寸四分字在左面右面薜蘿糾繞伏而
觀之橋名不詳叩諸寺僧龍友亦不知也

真華觀石塔題字

弟子高文忠朱文廣

共捨官會二伯貫

助建塔基莊嚴福

壽伯祐八年三月題

塔在永嘉真華觀今惟存石座在殿前正書字徑寸許按文獻通考官會錢始於宋有交子關子會子等名交子起於蜀以鐵錢重私爲券以便貿易其後置爲官務又行於河東陝西後又改爲錢引其行漸廣紹興中造關子自十千至百千凡五等三十年造會子止於一貫下至三百二百孝宗隆興元年詔官印會子以隆興尙書戶部官印會子之印爲文初意非卽以會爲錢厥後官無本錢印

造未已遂愈多而愈賤亦是立法之初講之不詳故也

徐兼等龍鼻洞題名

台岩徐兼徐耒

徐春伯咸午遊

右在洞左壁謝奕修題名之上正書

孫詒讓案徐兼徐耒無考謝春伯當是謝采伯兄弟行采伯臨海人字元若丞相謝深甫之子理宗謝后之諸父也嘉泰二年進士見陳耆卿嘉定赤城志此刻咸午疑當作戊午以時代考之慶元四年寶祐六年並直戊午今不能埒定爲何年以春伯當是謝奕修諸父今姑列於奕修題名之前

謝奕修胡元熊龍鼻洞題名

戊三月

奕修解郡印

胡元熊來遊

月卿執研

右在樂清雁山龍鼻洞左壁爲楊宗業詩碑壓掩
未見全文正書徑三寸八分月卿四字徑二寸三
分奕修疑是謝奕修淳祐間知温州戊乃庚戌卽
淳祐十年也

孫詒讓案謝奕修大理寺正采伯之子兄采伯所
著密齋筆記宋史度宗紀咸淳三年正月壽和大
后親屬謝奕修等各升補一秩卽其人也

霞泥菴石佛背題字

□□□□□乘仍□考妣宗親願證

□□上品功成不朽崇奉□窮昔寶祐甲寅臘月甲申日□工磨礪□名于石

鄒宗安 宗凱 德□ 德青 德成

蔣□道 德威 □孫 陳明□

右又□助建□□□□祈福壽增崇仗

佛

右永嘉四十九都霞泥菴石佛背面題字謝文波手拓本字七行末行字數莫計正書徑七分甲寅寶祐二年也

靈山院鐘銘款識

聖宋寶祐三年乙卯歲十月二十八日辛卯

當山釋 妙明 募緣重鑄洪鐘仍建鐘臺恭祝

今上皇帝聖壽無疆福及文武官僚六軍百姓者

當山比丘 善修 大心 善因 大詵 正譽

各助錢三千足

行歷行者 道珍 道圓 道玉 道端

右上層第一區計六行

又有第二區第三區助緣姓氏無關考證不錄

靈山院鐘銘

永嘉福壤 靈山梵宮 烹金大冶

克就洪鐘 擊于晨夕 警彼昏聩

形模既偉 聲韻唯雄 聲生至寂

韻合虛空 永揚佛事 遐播真風

拔幽塗之極苦視

庶筭以無窮

法慧院住持僧宗印助三千足徒弟普鑑助二千

右上層第四區計八行其第五區有都勸緣大
檀越進士李夢霄太學生李夢鯉鄉貢進士李
夢發登仕郎李夢炎進士李夢召進士李夢圭
迪功郎李夢震登仕郎李夢霆登仕郎李夢霖
共助錢一百千云云

以下至第六區皆助緣姓氏又下層第一區至第六

區亦皆助緣姓氏多至一百五十行俱不錄

右銅鐘在永嘉孤嶼江心寺高六尺八寸上圍一
丈一尺五寸八分下圍一丈五尺七寸二分銑厚
四寸上下各六區枚篆閒界爲四行如開元寺鐘

式上層匾高一尺八寸二分寬一尺五寸下層匾
高一尺四寸寬一尺七寸行字不等正書徑五六
分至一寸餘亦不等此本靈山院鐘据謝文波云
鑄于南宋寶祐開元時寺圯鐘入江心寺其或然
與進士李夢零李夢召李夢圭郡邑志並無考蓋
爾時鄉貢進士亦有此稱然獨李夢發稱鄉貢進
士其餘三人止稱進士殆脫漏耶又李夢震登涓
祐丁未科進士乃反不書進士何耶後閱蒼墩李
氏家譜夢零等兄弟九人俱在備錄如左以資參
攷夢零號檜堂先生鄉貢進士夢鯉字公立太學
時中齋上舍夢發字公啓鄉貢進士景炎丙子十
一月初三日遇元兵沒夢琰字公著舉漕試景炎

丙子十一月五日遇元兵沒夢召字公爽以秘書
省牒稱校勘夢圭字公錫京諭夢震字公起涪祐
丁未進士歷官山陰令真州州學教授差滁州錄
事參軍景炎初除提轄文思院監登聞檢院差知
漳州未赴改除朝請大夫帶行軍器監丞浙東制
司參議官就道中途遇兵遂歸養母號存心老子
夢震登仕郎夢霖字公說登仕郎譜牒本不甚足
据此有關考證姑存之而刪其冗贅之語

東村石塔題字

高樓里林元同妻吳九娘

前湖楊安

存鳳陳□□□彭永□

發心造此寶塔所

懺罪懃莊嚴福壽□

證菩提皆宋寶祐六

年十月朔日謹誌

右第一塔

高樓里信士陳慶國妻□

嶼後保陳氏宜暎

大金保信女趙十八娘同

心造此寶塔莊嚴福□□

咸就菩提者

右第二塔

孫詒讓案右石塔在瑞安四十八都東村塔凡七

座並有題字其五塔已傾圯未及盡拓也高樓里
今屬四十九都据此知宋時已有此名前湖存鳳
嶼後保大金保諸地名今並無攷

本從龍許峯靈跡記

真君靈跡滿天下遺井凡六許峯居其一皆所以鎮
妖災扶厄運也往歲每旱躬躋懷祈涸井泉湧雨輒
澍酷如已亥守令徧走群望弗福屬余請汲霧沛神
異今秋嘆囑復往乞靈隨獲潤濟余生不幸逢旱乾
者七幸而沐聖井之澤者亦七人之懷報者一方无
貳心也昔嘗結屋井右與鄉邦誓終皈奉莫支風雨
而摧今同志願共骨不朽者遂鞭石負土爲垣爲墀
位置峻截仙風凜然雖萬古猶一日後之來謁者莫

不曰真君功德及民如此正余今日勒珉之志云宋
景定庚申重陽松菴木從龍誌 同里人潘道鑑立
孫詒讓案右許峯靈跡記凡十四行行十四字十
五字不等石在瑞安許峯山許真君廟中近年修
廟掘地得之記文甚陋末題松菴木從龍誌自紀
因旱禱聖井得雨事又云嘗結屋井右誓終飯奉
則從龍殆卽廟中道士也記有云酷如己亥守令
徧走羣望弗福自景定庚申上涖己亥當是嘉熙
三年攷舊府縣志並不載是年旱又云今秋曠曠
則景定元年秋邑境亦旱地志亦並未載當據此
補其闕

□ 睿玉壙志

其明於死生嗚呼天平痛哉先君義方之訓切矣孤等何罪之極未□菽水之供遽罹襄奉之感尙忍言之先君生於嘉泰辛酉□月十三日卒於景定辛酉九月三十日得年僅六□□二孤等泣血忍死以壬戌閏九月□三日丙申奉柩葬于清泉鄉貧簪沙塘之原葬日迫姑誌歲月而納諸壙孤子端□□祐泣血百拜謹識

孫詒讓案右殘壙志在瑞安十二都沙塘山凡十九行行十七字前缺一行次行亦僅存五字其姓氏居里均不可攷惟知其名睿玉而已以志推之睿玉蓋未嘗仕宦而額題武靈宣義殆不可解又据志蓋其祖與余閤親屬僚友遂居郡城至其父

紱又徙瑞安余閱字光遠永嘉人隆興癸未進士
終知英州見樓鑰攻媿集宋晉之墓誌及萬厯府
志選舉門此云刺史永嘉余公閱刺史上蓋缺英
州二字志又載其祖以麟經傳家爲郡宗仰龍圖
鄭公諸先達多師事之鄭公卽文肅公伯熊嘗以
龍圖閣知建寧府見宋史儒林傳文肅爲永嘉儒
宗其所師事必一時邃學惜其姓名殘缺不可見
又志紀其葬以景定壬戌閏九月口三日丙申壬
戌爲景定三年檢汪氏厯代長術是年閏九月甲
申朔十三日適得丙申則九月下缺十字也

觀善堂鐘款

皇宋景定

三年壬戌

歲良月造

右上層第一區計三行

祝延

今上皇帝

聖壽無疆

右第二區計三行

觀善堂住

持僧景全

募衆成就

右第三區計三行

信男李士恭

同妻潘六十娘

施參伯券發

揚莊嚴福壽

右第四區計四行

右觀善堂鐵鐘今在永嘉城中譙樓上高四尺二寸下圍一丈界爲二層各分五區上層四區有字餘無良月十月也觀善堂無攷

建德教授胡公墓碣

廬山江萬頃書

宋古學論者建德府

教壇通所初公□□

孫詒讓案右宋胡公墓碣在永嘉十四都慈湖南

村碣文二行十六字篆書徑五寸許末二字泐去
不可辨右旁題名六字正書徑二寸萬頃二字特
小徑一寸略帶行筆此碣不著年月据舊府志宋
郡守題名有江萬頃咸淳元年知瑞安府慶宗時改温州
爲瑞安府攷宋史江萬里傳云都昌人弟萬頃官至正
郎咸淳十年饒州城破軍士執萬頃索金銀不得
支解之卽其人也此碣蓋卽咸淳間守郡時所書
胡公名亦無考宋建德府爲今嚴州府檢萬麻嚴
州府志宋教授題名亦無胡姓惟萬麻温州府志
宋論秀科有永嘉胡萬或卽其人

大廣化寺七佛塔題記

李府知郡位安人梅氏法名

喜靜

施財建造

七佛寶塔莊嚴福壽咸滄丙寅季春六日立

右第四塔

當山比丘□□幹緣

右第五塔

右塔在永嘉大廣化寺正書徑一寸許七塔惟中
塔及第五塔有字

劉黻龍鼻洞題名

劉黻叨 恩分闔侍

母經行偕弟璧璫表

弟解是思畊同遊靈

岩時住山如珙

咸滄庚午臘月十三

日題

文儁按右在樂清雁山龍鼻洞左壁趙師林題名
之後六行行字不等正書徑二寸二分此與師林
題字皆鐫刻甚深筆致樸茂可愛如珙二字石微
凹似敲損而跡尙明黻字聲伯樂清人淳祐十年
試入太學時丁大全方爲臺屬劾奏丞相董槐迫
逐去國欲奪其位黻率同舍生六人伏闕上書忤
執政送南安軍安置歸別其母解氏解氏曰爲臣
死忠以直被貶分也速行及大全敗還太學登景
定三年第以材試館職咸淳三年拜監察御史四
年改正字丁父憂去位服除授集英殿脩撰沿海
制置知慶元府事八年召還拜刑部侍郎九年試

吏部尙書十年丁母憂明年江上潰師丞相陳宜中起復黻爲端明殿學士不起及宜中謀擁二王由温州入海以兵逆黻共政於是託宗祀於母弟成伯遂起及羅浮以疾卒謚忠肅見宋史本傳及隆慶樂清縣志此云叨恩分閩庚午爲咸淳六年正授沿海制置使時蓋赴官便道奉母游雁蕩母卽解氏也

孫詒讓案劉忠肅蒙川遺稿母慶元郡太夫人解氏墓誌云子三長黻次應奎承奉郎監高郵軍富安廣儲倉兼淮南東路安撫大使司準遣少應璧國子進士今所傳舊寫本遺稿卷首亦有弟山中劉應奎成伯校正一行是本傳之成伯卽應奎字

此同游之弟璧卽應璧也惟此刻又有弟琛解夫
人墓誌亦未見疑忠肅從父弟矣解是思畊蓋卽
解夫人之姪墓誌載舅士龍之子白與忠肅同擢
景定壬戌第而不及是今亦無可攷

僧如洪雁山詩刻

石龍滴滴鼻中水二十

名泉類莫齊頭白山翁

貪漱齒杖藜逐石過橋

西咸淳七年八月秋日

靈鴈巖主橫川如洪書

文僞按右在雁山龍鼻洞下天柱峯前大石上五
行行九字行書徑七寸餘洪字水旁石陷前劉黻

題名云時住山如珙在此刻前一年或是一人然
細校兩刻偏旁一从水一从玉較然甚明莫能定
也龍鼻洞在屏霞障洞掌合頂高數十丈石紫色
中嵌石龍縹碧色鱗甲森然蜿蜒數百丈自洞外
繞至洞底伸一爪據地捲首爪旁鼻端小孔水時
時一下滴香滑甘冽山中名泉大小龍湫外尙二
十餘處此景尤爲怪絕其爪與鼻潔白晶瑩滑膩
非常李孝光謂是石髓積久化成非謬土人削取
以爲是寒冰石同治某年鼻竟被人擊斷今藏淨
名寺余請而觀之嘆憾移時天下事之壞於庸妄
人者豈獨一龍鼻哉

楊伯岳祝祖窰龍鼻洞題名

楊伯喆同

祝祖寧來

孫詒讓按右楊伯喆祝祖寧題名在樂清雁山龍鼻洞左壁二行行四字正書徑三寸四分伯喆南宋末人著有九經補韻六帖補等書今並有傳本四庫總目云伯喆字彥瞻號泳齋自稱代郡人然南宋時代郡已屬金蓋署郡望也淳祐閒以工部郎守衢州周密雲烟過眼錄載伯喆所見古器列高克恭胡泳之後似入元尚在矣謹案伯喆爲楊和王沂中曾孫見呂午六帖補序又周密癸辛雜識云先子爲衢倅時外舅楊彥瞻知郡旣而除工部郎中蓋卽總目所据又嘗以朝請郎知臨江軍

見舊鈔本薛尚功鐘鼎款識題字据癸辛襍志則
泳齋爲周公謹婦翁其所著九經補韻自序題嘉
定十七年旣已富有著述卽未中年亦必在弱冠
以後自嘉定十七年至德祐元年宋亡又歷五十
二載則泳齋入元益已七八十歲老年息影更歷
滄桑未必尙遠出遊覽此題必在宋時所刻無疑
也鼇峰教授訪得此刻而不能定其時代謹考其
大畧如此

通直郎徐公墓碣

宋故通直

郎徐公墓

孫詒讓案右墓碣亦在永嘉慈湖南村與胡教授

墓相去不遠石欹側草闕不知墓卽在其處否徐公名無考此碣亦不著年月隸書八字徑尺許殊古勁當爲宋時原石無疑附此

妙古寺鐘殘字

宋

永嘉來福門外妙果寺有古銅鐘焉約高四尺許舊埋土中今置山門內平地而屋之鐘紐古色黝然俗名豬頭鐘爲豬頭和尚募鑄語屬無稽此鐘相傳神異見府志鐘上字迹甚多漫漶不可辨每歲清明及中元下元城隍祭厲壇經此遊人持甌石捶擊兒童麇聚尤多終日鏗鉤聲聞數里俗傳擊者獲福佑殊可笑也余於甲戌冬仲偕陳聯科

茂才同往摩挲款識不可得四旁受擊處如蟲齧
然高者平平者窪矣蓋歲久擊多所致惟篆帶閒
細認尙存一宋字篆刻陰文徑一寸餘居然可辨
其爲北宋南宋無可攷殆有神物護持留此一字
知爲宋物則亦可幸矣故附箸之按猪頭和尚見
方勺泊宅編卽定光佛也

東甌金石志卷九